



Spezi Clique 1905 Stamm

Fasnacht 2015

S Paradyys macht d Dyyre zue

E Paradyys – isch ideal
aber s'isch au ganz normal
s'Isch's ebbis, wone jede wett
will's immer nur dr ander hett..
D Schwyz hett zwoor rächt hoochi Briis
me jommeret vyyl und fyyhlt sich mies
Und isch au d'Stimmig mänggmool fies
das Land vo Schoggi, Milch und Cheese
isch fyr vyyl andri: s Paradyys !!
das fiehrt zum Schluss, so wills mer schyyne:
ins Paradyys will jeden yyne
goosch aber e bitz wytter zrugg
spannsch yber hundert Joor e Brugg
no isch d'Schwyz, s'isch intressant
als Uss-Wanderigsland bekannt
Me muess sich ohni Rohstoff quääle
s'duet yberall an Arbet fääle
drum isch gly s'Paradyys verby
wenn doozemool wottsch ebber sy
no wandrisch uss, und zwoor scho gly
hesch kai Arbet, hesch kai Broot
oder mainsch, de schafftsch dy z dood
hesch kai rähti Zuekumft mee
und mainsch de findsch sy z'Yybersee
no haissts: Helvetia, adee !
Domools mien mir vo sällem Kueche
wo andri botte hänn, versueche
erscht mit dr Industrialisierig
kunnt denn d'Ruggwärts-Inszenierig
foot sich s Schiggsaal afoo keere
uss de Knächte wärde Heere
mänggmool allerdings au Niete
aber Arbet dien sy biete
so kunnt noonem Usslanddrugg
d'Wälle wieder zuen ys zrugg
1890 scho – kunnsch druss
wandere mee yy - statt uss
S Paradyys das hett voll glänzt
und s'hett kai Gsetz gää, wo's begränzt
Vor em erschte Krieg – s'isch krass
läbt zwor schon e halbi Million mit Ussländerpass
trotzdäm kennt me no fascht kai Fremdehass
Erscht bymen Ussländeraadail vo fuffzää Prozänt
kemme d Bedängge denn langsam emänd
aber zerscht gilt's jo no Arbetssgreft zämmezraffe
denn dr Schwyzer ka – und will – nimm alles schaffe
s'bruucht Fremdi zum Stroossen- und Yysebaanbau
aber immer mee fyr jedi Dräggsarbet au
S'Ganzi isch zwoor nie en Aibaanverkeer
aimool bruuchts weniger, aimool meer
aber s vergisst halt mänggmool dr Heer und Maischter
dass es Mensche sinn, die „er rief, die Gaischter“
mit andre Wort: by däm ganze Gekäär
aimool hii – und aimool häär
isch es sicher bsunders schwär
im Paradyys vo vorne bis hinde
immer die richtigi Mischig z finde
me darf die Ywandrigszaal nit toppe
me darf sy au nit ruckartig stoppe
und scho gar nit Eco-poppe
denn Ecopop wo me drum hett gstritte
hätt bedytttet, s Kind mit em Bad usschytte
Sisch aigentlich au e falsche Titel –
e falsches Zyyt mit falsche Mittel
gitts naimme mee Lyt uf däären Aerde
muess d Umwält nit partout schlächter wärde
d Lyt sälber mien das in Aagriff nää:
und besser Sorg zur Umwält gää
Wenn me Geduld hett, z akzeptiere
den andere Zyt gitt, sich z'integriere
no verliert me nie d Balance
und wär speeter ko isch, hett au e Chance
S gitt Schwyzer - uf em hooche Droon
mit durchuss arrogantem Doon
und dr falsche Diskretion
die sehn –in ihrem Marathon
vo usse numme Revolution
und Steerig vo nere Illusion
als Konfusion fyr d Nation
Andersytts gitts au Fremdi, wo niene
das Paradyys au wirgglig verdiene
sy wänn um jede Briis do lääbe
und benämme sich drnääbe
dien mit Drooge, Waffe und ähnliche Sache
ohni dass me's merggt, Millione mache
und numme nach ihrem Vordail gaffe
das hett denn au nyt mee z due mit Schaffe
däm sait me numme no: schlaraaffe....
Wär so mit Gwalt steert unseri Rueh
fyr dä blybt unseri Dyyre zue
Trotzdäm: radikali Ussländerrächt
schleen dr Guet und maine dr Schlächt
gnau das hett me provoziert
und am 9. Februar au akzeptiert
fixi Yywandrigszaale zementiert
und dodrmit s Klischee neu fixiert
dass d Schwyz maischtens numme kollaboriert
wenn sy sälber drvo profitiert
und wenn s'vor allem fyr uns rentiert
waish wie däm au no duet saage, Digge
dasch doch gar nyt anders als Rosine bigge...
In dr Mainig, s haig immer z vyyl yynegschwemmt
hett me aifach s'Dyyrli jetz verglemmt
mit de Bilaterale in dr ainte Hand
und em diplomatische Sachverstand
wird sich s'Ganzi scho no ne weeneli keere
und sich die Dyyre e bitzli loo entspeere....
Extrems sorgt immer fyr e Riss
was zellt, das isch e Kompromiss
mer pflääge unser Paradyys
und mer leege's nit uff s Yyd...
denn was wär ächtsch - wurd' me vor em Stärbe
immer mit em Slogan wärbe:
Sträng dy nit aa - es isch fyr d'Katz
im Paradyys hett kain mee Blatz ?
so radikal ka niemerts sy
drum seet's au gly e jeden yy:
duet naimen e Paradyys bestoo
ischs fyr alli mit guetem Wille doo –
Und jede sott derfen yynegoo -
und zwoor yberall – und ganz glyych wenn und wo...!

D Ladäärneusstellig isch vom Mäntignacht, em 23. Februar, bis am Mittwoch-
demoorge, em 25. Februar, uff em Minschterplatz. Mir fraien is uff lire Bsuech.